

四庫全書

集部

欽定四庫全書

宋詩紀事卷二十八

錢塘厲鶚撰

李昭玘

昭玘字成季任城人濤五世孫自洛徙齊元豐
二年進士以薦爲祕書正字厯起居舍人崇寧
入黨籍奪官閒居自號樂靜先生有樂靜集

雲龕李氏序畧云伯父詩奇麗愜適章斷句絕
餘思羨溢得詩人味外之味

春日遊金明池

日有江湖思坐無車馬塵橫橋自照水啼鳥不驚人輦
路晴飛絮宮門暗鎖春多情老園吏灑地喜相親

宋文鑑

觀劉孝嗣寫真

程生高價傳兩都劉子骨相真丈夫呼兒當軒試一展
嚶嚶指點相驚呼此應前日坐頭客何乃不語嚴襟裾
胸中豪氣不可狀但見粉墨無紆餘虎頭食肉亦天賦
尺面封侯宜不誣須知中令有真相忽效香山悲故吾
凌煙功臣易磨滅貞觀學士猶傳模當時人物不易得

曾看風神有此無

觀江都王畫馬

落落名王唐帝孫
筆端飛灑只逡巡
風雲絕足知何在
粉墨餘姿若有神
可信權奇盡龍種
不應腰股失天真
驂騑寂寞龍眠死
更復何人接後塵

觀畫

夢澤正天寒
南峯帶秋色
詩人句不盡
餘意傳粉墨
年來兩眼昏
吏牘苦侵迫
明窗展橫素
刮膜謝砭石
往時

蓬萊宮圖畫燦東壁拾遺老陰峭思訓麗春碧經年一
過眼行繞不暇食太行逢李生筆勢妙思索未成真營
丘不俗已高格安得十萬錢盡致鵝溪白不須念衣裘
鑿灰日滋殖寫我江湖心浩蕩滿千尺

以上聲畫集

句

靜疑多事非求福老覺無心勝攝生

優古堂詩話

劉 弇

弇字偉明江西安福人元豐二年進士復中詞

科厯官知我眉縣改太學博士元符中有事南
郊進大禮賦除祕書省正字徽宗立改著作佐
郎實錄院檢討卒有龍雲集

走筆答郭子隆句稽

春歸幾何時綠樹陰已滿蕭條子雲巷誰借吹噓暖常
日雙柴扉深局類休澣穉燕掠翩翩踈疎蟬弄淒斷擷芳
聊自娛任從食息嬾嶷嶷棲鸞郎蝸居間三款兒童憚
逢迎應客事謾誕謝絕高軒榮祗增鼯鼠短賴君不吾

新慙懃接閭侃酸然梅雨天煩襟斗湔浣

送李侯朝散還任

西山閱今昔章水弄清泚雲罍插天半滕閣中隱起青
鴛千萬家湖光豁如洗鍾陵一都會信亦非偶爾君來
無幾何所得已倍蓰笑談送白日慷慨拾遐軌成詩殆
百篇天籟落凡耳事竣告還朝相送情難已悲歌一再
行杯觴覆蒼翠秋標拔孤雲鴻鴈思吾子

人日

去年人日螺江邊今年人日在通川故家浩蕩五千里
客子騷屑心茫然霜蘆盡解故時葉生意陡爾歸蘭荃
海風如刀冰塞渡欲航野水雪暗天他鄉信美非吾土
香草悅魂真浪傳南冠故聲祇操楚劉章雅志惟歌田
五秉如單費廩粟一囊就盡持餐錢顛毛冉冉不吾與
齒根浮動輕于翾小雀誰言畏死鷄未肯屈折同杯棬
章貢直西三徑在爾來望眼欲成穿科桑洗竹真吾事
孰使齷齪纔充員何時解得無拘束歸釣潭頭楓葉編

秋日儀真卽事

丁字河頭紋錦翼似是東園故鷓鴣
天風蕭蕭吹汝急遣汝周章無好色
江籬羃歷過行人一顧爲之三歎息
我願舴艋從溪翁雙春鋤邊作幽客

莆田雜詩

清樾陂陀外春深四五家
叢祠下簫鼓平楚暗桑麻
水國潛虯偃天程去鳥賒仙山乃在目
瀟灑送生涯

九曲池

昔帝檣烏下日邊曾畱清蹕此踰躔魚龍窟暗浮春漲
鳬雁行低破暝煙星閣推頽空歲月蕪城埋沒舊山川
後庭一曲陳家破更看當年水調傳

題吉水南華院

紫翠浮浮奪晚昏生涯谷汲與松焚俗塵一點自應少
終日到門惟白雲

野興由來愜杖藜層巒影裏見翬飛虛堂一炷起凝碧
化作九天雲染衣

以上龍雲集

獨醒雜志吉水南華院在山谷窮絕處有白雲
堂劉偉明未第時曾寓書劔于此堂有詩

劉 跂

跂字斯立摯之子王輦之壻與弟蹈同登元豐
三年進士遭黨禍爲李延年所誣編管壽春自
號學易老人有學易集

題半隱堂

一堂圖籍自陶冶三徑蕭蘭俱歲華定非平恩許侯宅
曾是仲長公理家端居雅不煩摒擋佳設頗嘗成咄嗟

唯我身閒數來往徽弦一汎即生涯

宋文鑑

絕句

麥隴漫漫宿豪黃新苗寸寸未經霜
手中馬箠餘三尺想見歸時如許長

能改齋漫錄

句

急雨欲來先暑氣涼風已過卻秋聲

龍山寺古堂詩話優

欲成

塞士賦應作半人詩

病中

後村詩話

黃裳

裳字冕仲南平人元豐五年進士第一累官端
明殿學士禮部尚書有演山集

王忱序云逸歌長句駿發踔厲兼衆體而有之

簡元輿祠部

百花巖上仙人住巖下爲州山水聚白頭青冢南北人
倒影沈沈獨懷古倚闌把酒與誰同況是使君爲獻主
應喚漁舟疎葦中旋膾游鱗落紅縷祕書坐上最軒昂
能共春雲爭態度紅衣帶月今何處幾轉春殘掩朱戶

飛船送客空斷腸
梁塵謾落聲中句
虛白亭前湖水間
忽爲霓裳起思慕
出門沙土亂如雨
薰風吹夢天南去

燕子樓

盼盼初歸樓上時
相如燕子長雙飛
有才將色世間少
沉復節義猶堪依
將軍一去十餘載
玉簫瑤瑟無心解
豈不能死空相隨
以色累公非所知
白老曾爲賦詩客
風裊花枝醉無力
後會勲郎漢陽驛
因語歔歔已成昔
走筆還賡美人句
猶感白楊堪作柱
我來登賞非唐人

尚引多情聊愴神人生真盡皆爲塵百年一餉難畱春
高樓人散誰復親只有燕子年年新

社日遊雲門山

不須扶我自登山腳力能勝十八盤一字雁低頭上過
兩城人細掌中看雖知北戶緣猶在卻笑南柯夢未闌
忽見歸雲應是信滿襟先得洞天寒

秋日有感

秋來猶寄一涯天葉葉秋聲似去年可恨蕭晨長在客

不堪孤館更聞蟬

以上演山集

晁說之

說之字以道濟州鉅野人端彥之子自號景迂
生元豐五年進士蘇軾以著述科薦元符末與
崔鷗同書邪籍靖康初召爲著作郎試中書舍
人兼東宮詹事建炎初終徽猷閣待制有景迂
生集

陳叔易被召出山作二絕句

東海一生垂釣客石渠萬卷校書郎
丈人風味今如此
鶴到揚州興更長
鶚按此首本集無

處士何人爲作牙
盡攜猿鶴到京華
故山巖壑應惆悵
六六峯前只一家

風月堂詩話唐秦系和韋蘇州詩具銜云東海
釣客試祕書省校書郎本朝陳恬叔易隱陽翟
澗上號澗上大人
大觀間宋喬年諷監司薦于
朝起爲館閣書疏中猶不去大人之號晁以道
作詩譏之其後以道謁叔易于京師有婢應門
嚴妝麗服熟視之乃故時澗上赤腳也以道又
作一絕云

明皇打毬圖

宮殿千門白晝開
三郎沈醉打毬回
九齡已老韓休死
明日應無諫疏來

超然亭戲作

時爲明州船場

終日一杯終日醉
看潮初上看潮回
自疑前世陶貞白
乘興閒遊鄮縣來

贈筆處士屠希

屠希祖是屠牛坦
今日卻屠秋兔毫
自識有心三副健

可憐無補一生勞

排悶

廊時來爲吏多愁尚喜論山川分漢郡人物客羌村

杜老

詩有羌村

宮廢神仙在天清貳負昏

山海經貳負之枯在此

莫言無

妙麗土穉動金門

陸放翁跋景迂此詩云廊人善作土偶兒精巧雖都下莫及宮禁及貴戚家爭以高價取之喪亂隔絕南人不復知此句遂亦難解可歎

鄭洛道中遇降羌作

鶚按宋文鑑作晁詠之

沙場尺箠致羌渾玉陞俱承雨露恩自笑百年家鳳闕
一生腸斷國西門

老學庵筆記晁氏世居都下昭德坊其家以元祐黨人及元符上書籍記不許入國門者數人以道其一也鄭洛道中遇降羌以道詩云云

答陳叔易求長松

長松不經黃帝手小斲漫翻嵩室雲縱有何堪寄夫子
鼎頭寶氣自氤氲

思四明所居

今朝旅恨到何處
軒窗直到桃花渡
桃花渡上風吹雨
道人芒屨誰來去

贈鄺田玘

前世能歌田順郎
今身追悔太昌昌
戲泥巧盡羣兒態
休憶小姑初倚牀

以上景迂生集

老學庵筆記承平時鄺州田氏作泥孩兒名天下態度無窮一對至直十緡一牀至三十千一牀者或五或七也予家舊藏一對臥者有小字云鄺州田玘製

句

干戈難作牆東客疾病猶存硯北身

墨莊漫錄晁說之以道作感事詩云云牆東用王君公事而硯北身乃漢上題襟集段成式書云杯宴之餘常居硯北蓋言几案南面人坐硯之北也

晁補之

補之字无咎年十七從父端友宰杭州之新城
著錢唐七述受知蘇軾舉進士試開封及禮部
別院皆第一元祐中爲著作郎紹聖末謫監信
州酒稅起知泗州入黨籍有雞肋集

芳儀曲

金陵宮殿春霏微江南花發鷓鴣飛風流國主家千口
十五吹簫粉黛稀滿堂詩酒皆詞客奪錦揮毫在瑤席
後庭一曲風景改收淚臨江悲故國令公獻籍朝未央
敕書築第優降王魏俘曾不輸織室供奉一官奔武疆
秦淮潮水鍾山樹塞北江南易懷土雙燕清秋夢栢梁
吹落天涯猶並羽相隨未是斷腸悲黃河應有卻還時
寧知翻手一朝事咫尺山河不可期倉皇三鼓溲沱岸

良人白馬今誰見國亡家破一身存薄命如雲信流轉
芳儀加我名字新教歌遣舞不由人採珠拾翠衣裳好
深紅暗盡驚邊塵陰山射虎邊風急嘈雜琵琶酒闌泣
無言數徧天河星只有南箕近鄉邑當年千指渡江來
千指不知身獨哀中原骨肉又零落黃鵠寄意何當回
生男自有四方志女子那知出門事君不見李陵椎髻
泣窮邊丈夫漂泊猶堪憐

避暑漫鈔李芳儀江南國主李景女也納土後
在京師初嫁供奉官孫某爲武疆都監爲遼中

聖宗所獲封芳儀生公主一人趙至忠虞部自北歸明嘗仕遼爲翰林學士修國史著虜庭雜記載其事時晁補之爲北都教官覽其書而悲之與顏復長道作芳儀曲云云江州廬山真風觀李主有國日施財修之刊姓氏于石有太寧公主永禧公主皆李景女不知芳儀者孰是也

行路難和鮮于大夫子駿

贈君珊瑚夜光之角枕玳瑁明月之雕牀一繭秋蟾一麗穀百和更生之寶香穠華紛紛白日暮紅顏寂寂無畱芳人生失意十八九君心美惡誰能量願君虛懷廣末照聽我一曲關山長不見班姬與陳后寧聞衰落尚

專房

茗溪漁隱叢話余觀雞肋集古樂府是其所長
辭格俊逸可喜

自題畫畱春堂山水大屏

胸中正可吞雲夢
盞裏何妨對聖賢
有意清秋入衡霍
爲君無盡寫江天

和李秬雙頭牡丹

二喬新獲吳宮怯
雙隗初臨晉帳羞
月地故應相伴語
風前各是一般愁

廬山

南康南麓江州北五百僧房綴蜜脾盡是廬山佳絕處
不知何處合題詩

塔山對雨

在新城縣

山外圓天一鏡開山頭雲起似浮埃松吟竹舞水紋亂
坐見溪南風雨來

謝王立之送蠟梅

去年不見蠟梅開準擬新年恰恰來芳菲意淺姿容淺

憶得素兒如此梅

以上雞肋集

墨莊漫錄王直方立之父名棧家多侍兒而小鬟素兒尤妍麗王嘗以蠟梅花送晁無咎以詩謝之有句云云

考校同文館戲贈子方兼呈文潛

二十年來曹子方新詩曾見未能忘
多才善謔稱物芳
吳娃席上呼作郎
瞥然何許歲月長
只今未老毛髮蒼
自言逢掖非昔狂
傳經華陰夫子堂
何曾騎馬身挾槍
詔隨上將西擊羌
董蒲跗注謂我臧
夜行馬嶺飢無糧

鼓鼙驚谷騎卷岡吏呼爲微醉在牀前鋒奄至靈武傍
中堅反後無敢驤城開三日牧蔽隍百駝載竒千橐裝
旌旗立壘烏烏揚還軍不省一矢亡坐師無獲勞不償
饒歌入秦虛錦囊秋風鱸魚思故鄉銳頭宜董鶴鵝行
得官猶領萬驕驕王城對巷如參商那知連月居茲房
稱多量少非我王羣公古鏡懸秋光閉門飯飽庭葉黃
秋盤登兔官酌香吳音訛雜變秦涼令壺老柏笑覆觴
淹留平日夢欲翔得君可樂殊未央人生傾蓋何所望

結交松柏要冰霜中天號出玉璽章青驄御史騰康莊
歸期屈指未可忙聞君況有夢虺祥生女不惡嫁鄰牆
掃軒畱客具酒漿與君更約城南張

同文館倡和詩

余 幹

幹字樗年

次韻贈无咎學士

毗陵城如金斗方往事歷歷那能忘相逢童子佩蘭芳
秀發人指誰家郎未幾重見突而長即今不覺秋蓬蒼

戲笑豈復爲兒狂追昔宓子初登堂辭鋒峭拔森刀槍
器識況遠包夷羌陽秋寧肯露舌臧有子遊學先聚糧
相將百里陟岵岡邂逅一揖坐僧牀大辯傾注如無旁
天馬方謂先騫驤觀魚誰復駐濠隍瓜期受代垂趨裝
當路秦牘交稱揚行將起擢奄云亡坐令志氣不得償
傳家豈詫錢一囊諸兒經行名州鄉挾書繼踵諸父行
旋見天衢飛驪駟論治直要超周商術卑效淺笑杜房
況是亨運遭興王致君紹祖那家光何止追考歸焚黃

邃庭朝露明芸香異書滿閣秋氣涼詠歌間成隨豆觴
讀之如欲凌雲翔暫迂大手離未央

闕六字

望

挈篋來寄深閨霜賓興賢能視文章尊尚周孔麾韓莊
搜奇殆有通夕忙英游疑動聚星祥我歸復翳環堵牆
世味已能如飲漿羲皇上人琴一張

同文館倡和詩

耿南仲

南仲字晦道開封府人元豐五年進士徽宗朝
爲太子詹事改寶文閣直學士欽宗朝陞尚書

左丞門下侍郎高宗即位罷爲觀文殿學士提
舉洞霄宮言者論其主和誤國鐫秩安置南雄
州行至吉州卒

秋日同文館次鄧慎思韻

秋日同文館閒無一事依鬪羊誰得雋倦鳥客思歸寢
處還相向過從不患稀何當有星聚誰爲問璇璣
秋日同文館褒然觀國光泗濱何限磬岱麓易求梁劒
氣頻衝斗錐鋒定出囊於余慙拙匠操尺預量長

秋日同文館新涼
逐雨回棘垣
要吏局蕙悵
憶山隈
射爲巧狙發
田因文豹來
西城隨分鎖
夫我室多才

次韻謹思九日考罷試卷呈同院諸公

貢珍已選茂
良充猶被拘
縻類縛鐘
淥酒強陪高
館飲黃花不似
故園逢
棊枰苦戰挑
燈坐
蘚壁閒題
捧硯從風
葉滿庭
秋索寞更
籌向盡
睡方濃

以上同文館倡和詩

柳子文

子文字仲遠

次韻呈慎思學士

咸韶護武來何方鏗鏘入耳安能忘陽春蘭芷秋菊芳
金門詞客青袍郎昭回下燭光燄長深山大澤龍蛇蒼
浩歌激烈元非狂正逢聖主開明堂風煙關塞收旗槍
舞干兩階臣戎羌喋血拓境謀非臧邊城夜行休齋糧
採詩不復嘲青岡蚍蜉戢羽戍婦牀移文北山猿鶴傷
渥洼朱龍兩服驤胥靡版築罷浚隍白環楛矢貢篚裝
航海萬里風帆揚窮邊種落嗟屑亡諸蕃入學願可償

槐花舉子促書囊成均貢士賢登鄉東門宣詔札十行
我慙駑駘追驪驕何敢望回不及商毛遂未至空連房

同舍十九人
余獨後入

賴有墨妙江都王傳摸共分此日光驂

騶駼驃兩耳黃想見蹙踏披天香坐覺暑退秋堂涼拘
攣齷齪漫引觴門外烏兔雙飛翔悠悠逝川東未央故
山魚鳥空相望鄧侯意氣摩秋霜朝吟百篇暮千章駢
羅經史貫列莊落紙但見書吏忙孔鸞羽儀各效祥鄙
夫不學空面牆先饋不用驚五漿烏號要須貴育張

同文

館倡和詩

商倚

倚淄川人官太學博士入元祐黨籍

秋日同文館次鄧慎思韻

秋日同文館高堂燕集齊杯盤供魯酒穀核欠張梨楊
孟持新論韓莊鄙舊題須知宗匠手文采冠朝闈

秋日同文館何人獨擅場養我方在泚琢玉已成章筆
別千鋒陣庭焚一炷香得賢從此始豈特致民康

秋日同文館棲林看晚雞斗垂宮殿北月轉戶庭西酒
勸杯中淥詩分燭下題何時還九陌細雨莫成泥

初入試院

承詔掄材敢倦行廣庭深鎖待羣英分場自敵三千客
決勝誰降七十城夜案尚閒塗卷筆曉堂方聽讀書聲
每早嘗聞无咎
諸公讀書聲歸時還有黃花否已覺秋風滿袖生
以上
同文館倡和詩

李之儀

之儀字端叔之純從弟元豐中舉進士元祐初
爲樞密院編修官從蘇軾於定州幕府元符中
監內香藥庫徽宗朝提舉河東常平坐草范純
仁遺表編管太平州卒

揮塵後錄元祐間端叔于尺牘尤工東坡先生
稱之以爲得發遣三昧

利州湯泉

華清賜浴記當年偶託荒山結勝緣未必興衰異今昔
曾經天女卸金鈿

墨莊漫錄利州褒禪山相近地名平疴鎮湯泉
溫溫可探是朱砂湯人傳昔有兩美人來浴既
去異香郁郁累日不散端叔過浴池上作詩云

贈人 一作與當塗楊珠

通中玉冷夢偏長
花影籠堦月浸涼
挽斷羅巾畱不住
覺來猶有去時香

情隨榆莢不勝飄
心似楊花暖欲消
擬借瓊林大盈庫
約君孤注賭妖嬈

詠呂吉甫宅晉朝雙檜

用劉夢得韻

故迹悲涼古木奇勢分庭下蔚相差霜根半露出林虎
畫影全舒破賊旗寶界曾回鋪地色節旄遠映插雲枝
劉郎風韻知誰敵儒帥端能表異時

墨莊漫錄揚州呂吉甫觀文宅乃晉鎮西將軍
謝仁祖宅也在唐為法雲寺有雙檜存焉猶當
時物也劉禹錫有詩吉甫家居時檜尚依然建
炎兵火樹遂亡矣

李去言相別二年忽得書知在吳中荅書偶成

官路相逢一笑休共知身世兩虛舟楚材有用誰青眼
趙將無功枉白頭會見姓名通北闕何妨風韻冠南州

求田接武如鳬鷖只欠元龍百尺樓

書扇

幾年無事在江湖醉倒黃公舊酒壚覺後不知新月上
滿身花影倩人扶

曾延之置酒後閣侍人以裙帶求詩

御醅盞畔千頭菊椽燭光中四和香紅粉莫嗟霜滿頰
也應歌處似周郎

以上姑溪集

借范光祿麻師一雪雀圖

時任許幕

圖中塵跡已冥冥說著麻翁耳便醒
凍雀高低棲舞白
枯槎零亂倚寒青欲憑妙手聊模寫
暫借遺蹤作典刑
老去未能忘著相他年要伴草堂靈

過庭錄

還俗道士

聞道華陽客儒衣謁紫微舊山連藥竇
孤鶴帶雲歸柳
市名猶在桃源夢已稀還家見鷗鳥
應媿背船飛

老學庵筆

記

趙德儒

德儒爵里未詳與李端叔倡和

中隱庵

在昔避世賢隱居豈自喜甘守西山餓清洗潁陽耳一
旦事高尚萬古激貪鄙孰謂樂山林便可輕朝市竊笑
效顰人不知捧心美妄將凡庸姿敢希明哲軌盜此嘉
遜名紛若干時子仕途指捷徑矯僞污清史聖朝揚仄
陋采錄無遐邇不遺下體葑沴乃中鄉邑多士生此時
貧且賤焉恥夢自傳巖來獵從渭濱起隱居聞此風翻

然烏可已聊爲知者道庶達名庵旨 姑溪集附

王鞏

鞏字定國莘縣人文正公旦之孫工部尚書素
之子嘗倅揚州坐與蘇軾遊謫監筠州鹽稅罷
還官至宗正丞入黨籍自號清虛先生有集

墨莊漫錄王定國寄詩于東坡荅書云新詩篇
篇皆奇老拙此回真不及矣窮人之具輒欲交
割與公魏道輔見而笑曰定國亦難作交代只
是且權攝耳

輓蘇黃門子由

憶昔持風憲防微意獨深一時經國慮千載愛君心坤

道存終始乾綱正古今當時人物盡惆悵知音

元祐自注

中議冊后宣仁御文德殿發冊公語余密告呂丞相微仲母后御前殿茲不可啓微仲明日留身宣仁詔宮中本殿發冊時人無知者

已矣東門路空悲未盡情交親踰四紀憂患共平生此

去音容隔徒多涕淚橫蜀山千萬疊何處是佳城

自注公前

年寄書約予至許田曰有南齋翠竹滿軒可與定國爲十日之飲此老年未盡之情也

靜者宜膺壽胡爲忽夢楹傷嗟見行路優典識皇情徒

泣巴山路終悲蜀道程弟兄仁達意千古各垂名

自注公與

子瞻嘗泊巴江夜雨相約伴還蜀竟不果歸今子瞻葬汝公歸眉山王祥有言歸葬仁也畱葬達也墨莊漫錄

蕭相樓

盧杞姦邪四海憂相君邦國自同休分符朝去雲中闕
開府南來江上州百尺樓高瞻故國九華山色倚晴眸
定知直道傳千古杜牧文章在上頭

方輿勝覽杜牧池州重建蕭相樓記蕭丞相復爲刺史時樹樓于大廳西北隅上藏九經書下

爲刺史便廳事大厯十年乙卯建會昌四年甲子權刺史李方元具材刺史杜牧命工皆仍舊制自初至再凡七十一年

湘山光孝寺

半嶺風吹草木香
落堦花雨送春忙
從師遠借雲庵臥
還我平生午枕涼
蓮社緇黃常得伴
鹿門妻子亦相將
化身欲似河東柳
更向山頭望故鄉

桂林府志

楊天惠

天惠字祐父
郢縣人
元豐進士
攝邛州學官
徽

宗朝上書言事入黨籍卒左丞馮澥志其墓號

西州文伯

次韻吳帥題保福壁

淨鉸猶貯近頒冰拄杖還扶舊醉藤遮莫簪花倩天女
未妨燕坐折談僧

送孫正忠移成都小漕

升平芝菌效神奇況乃賢豪用世資人物熙寧中興日
風流荆國適同時起家便作三公客秉傳何爲九折馳

少府但分新賜節石渠猶借舊官儀素心久辨經綸計
妙意前知遇合期聊與西南成勝事暫將清獻續良規
橋橫萬里重開府水接雙流共去思
道傍索筆強題詩

溫江縣二瑞頌

并序

溫江隸成都遠王畿三千幾百里有奇蓋西南偏邑
也政和二年夏六月有嘉禾產於嚴氏之圃凡二本
是歲十二月復有甘露降于學宮之柏凡三日鄉以

白縣縣以白府府遣從事即縣覈狀皆有實可復不
誣輒具書若圖上尚書省以聞詔下其副尚書禮部
藏焉于是前縣臣宗道馳書諭假彭山丞臣天惠曰
盍頌諸臣對越北闕而奏頌曰

於皇御極百志惟敘曰農而農曰士而士爾安爾宮爾
寧爾畝恩詔數下仁滴德撫農飽以歌士喜式舞協氣
從之祥嘏如雨廼產嘉禾以慶農扈廼降甘露以幸士
子其慶伊何珠穗紛舉爾甌窶戶有億秭其幸維何

雲液醲滑俾爾膏馥濡及嬰孺維我哲后博臨下土相
彼多禾均此靈露道拜稽首誕告奔走惠拜稽首盱衡
語語敢獻稗官以贊矇瞽

以上成都文類

劉 拯

拯字彥修宣州南陵人第進士元豐中爲監察
御史徽宗朝累遷吏部尚書

空心潭

碧潭發幽石瀟灑無纖塵寒光湛秋月有物難比倫離

鉤況無魚千尺徒垂綸到此心已空何用濯我纓

破山寺志

張商英

商英字天覺號無盡居士蜀之新津人登進士
第爲章惇所薦紹聖初累擢左司諫工部侍郎
大觀中歷尚書右僕射中書侍郎貶衡州復官
卒贈少保諡文忠曾入黨籍有無盡集

揮麈前錄張天覺紹聖初章子厚薦登言路攻
擊元祐諸賢不遺餘力至欲發溫公呂正獻公
之墓晚既免相詩有回看同列進不覺寸心忙
之句桐江集商英雄辨詭譎自謂得兜率悅之

傳天下號相公禪

孤憤吟

青青一本桑下可百夫息泠泠一井泉上有千人汲千里以爲郡百里以爲邑生齒豈不繁教化繫爾力何事北窗人歎此徒勞職

宋文鑑

留題護國寺

時爲雒縣主簿經攝垆窯鎮稅

薄宦區區可歎嗟寂寥寒館過村家神錐豈向囊中出寶劍聊憑醉後誇就祿勉持毛義檄讀書空滿惠生車

掩關不識青春好一夜狂風已落花

成都文類

靈泉寺著法華合論作寺在歸州西三里

合道通爲七卷經默教開眼示羣生不須天女添瓶水

自有靈泉一派清

方輿勝覽

中秋

不見柯山客中秋月又圓夜來清滴露天末淡收煙念

遠情非俗凌虛骨欲仙素琴鳴此恨相與對嬋娟

合璧事類

前集

讀書燈

小籠踈四面明紙罩孤燈自小共寒熱相親如友朋舊

書曾偏照新燭莫相憎幾爲吟詩苦畱光到夙興

合璧事類

外集

貓

白玉狻猊藉錦茵寫經湖上淨名軒吾方大謬求前定
爾亦何知不少喧出沒任從倉內鼠鑽窺寧似檻中猿
高眠永日長相對更約冬衾共足溫

合璧事類別集

華陽洞

素虎班蚪躡紫煙幾看滄海變桑田
赤城玉笥尋真後又到華陽第八天

茅山集

見山亭

簾卷疎煙醉眼開浮雲飛盡見崔嵬
苦嗟霖雨遮藏久深謝清風引致來
丹桂有時明月滿舊山無路白猿哀
禪僧指我真空理心火茫然一夜灰

杭州府志

青原山七祖塔

一派青原出少林信衣到此只傳心尋常示衆無人會

盡向廬陵米價尋

青原山志

題睢陽五老圖肅奉嚴韻

德政調元向道閒天朝詔許實辭冠丹心耿耿懸象魏
青史昭昭照玉桓晚節友賢陽鳳暖老年憂世谷駒寒
太平猶自存龜鑑後進儀刑仰慕看

式古堂書考

吳與

與字可權漳浦人元豐五年進士餘干令累遷

奉議郎通判潮州

白雲亭

在餘干縣白雲城上唐李德裕建

高城頓崇岡上與白雲遇昔賢此登臨懷古得佳句結
亭自何人歲月更已屢古篆僅存名顏簷颯將仆我來
訪遺蹤環賞愜幽趣鳩工扶墊隍選木換隳蠹津梁五
道人悉力願相赴經營未終月突兀見暈翳英英蒼梧
雲朝暮此屯聚時從南山來倏向高巖去去來本無心
虛亭日新故因之望故鄉更識親闡處南山互牽情凭

闌目空注 饒州府志

鄒浩

浩字志完常州晉陵人元豐五年進士擢右正
言坐諫立劉后謫新州徽宗朝遷吏部侍郎再
謫永州大觀元年復直龍圖閣卒入黨籍高宗
朝贈寶文閣學士諡曰忠有道鄉集

送俞秀老歸維揚

踏雪驅驅原憲履御風獵獵老萊衣情投豈比鍾山出

興盡還同剡水歸
煬帝池邊松蔭遠
維摩室內燭光微
攜筇促席徜徉處
應記當年接下機

湖上雜詠

荷葉如錢三月時
幅巾藜杖一追隨
邇來勝事知多少
惟有風標公子知

杜牧之以白鷺爲風標公子

過永州澹山巖作

我入幽巖亦偶然
初無消息與人傳
訓狐戲學仙伽客
一夜飛鳴報老禪

以上道鄉集

冷齋夜話鄒志完南遷北還過永州澹山巖巖
有訓狐凡貴客至則鳴志完將至而狐輒鳴寺
僧出迎志完怪之僧以鳴狐爲對志完有詩云
云

弔仲殊長老

逆行天莫測雉作瀆中經漚滅風前質蓮開火後形鉢
盂殘蜜白爐篆冷煙青空有誰家曲人間得細聽

老學庵筆記仲殊長老喜食蜜崇寧中忽上堂
辭衆閉門自縊死及火化舍利不可勝計鄒忠
公作詩云云末句謂其工於樂府也

游酢

酢字定夫建州建陽人嘉祐間以文行知名程
明道典扶溝學招使肄業登元豐五年進士仕
至監察御史歷知漢陽軍和舒濠三州有集

餞賀方回分韻得歸字

邀客十分飲送君千里歸情隨綠水去目斷白鷗飛松
菊今應在風塵昔已非維舟後夜月能不重依依

瀛洛
風雅

題河清縣廨

小院閒亭長薜蘿鹿來穿徑晚經過夕陽蕭散簿書少

窗裏南山明月多

水亭

清溪一曲繞朱樓
荷密風稠咽斷流
夾岸垂楊煙細細

小橋流水即滄洲

以上河南府志

鍾 佃

佃字少游又字公緒
贛州龍南人元豐五年進士
累官廣西計度轉運使
進龍圖閣學士兼本路安撫管句
經畧使致仕有集

龍南石玉巖

萬石結叢林，縈回鳥道深。
山高雲漠漠，洞古綠陰陰。
壁擁蚪龍篆，崖懸鍾鼓音。
不須愁日暮，勝景且追尋。

贛州府志

件盤

盤字良翁終南人，父信本軍職終文思副使，以
陰補借職元豐中監青州臨淄酒稅。

絕句

太一峯前是我家，滿牀書籍舊生涯。
春城戀酒不歸去。

老卻碧桃無限花

西溪叢話或以此詩題酒樓皆云是神仙非也

陳輔

輔字輔之丹陽人少負俊才不事科舉自號南郭子人稱南郭先生

訪建康楊德逢題壁

北山松粉未飄花
白下風輕麥腳斜
身似舊時王謝燕
一年一度到君家

茗溪漁隱叢話楊德逢驥居金陵輔每清明上
冢卽過湖陰之居清談終日元豐間頻歲訪之
不遇乃題此詩楊歸見之吟賞不置嘗稱于荆
公公笑曰此正戲君爲尋常百姓耳楊亦大笑

湖上有作

平湖共天遠浸月坐寒光
乘流溯荃壁棹舟尋葯房
佳
人折輕荷隨風來珍香
顧眄但微笑眉宇何清
揚日暮
共攜手遙指煙中湘
鎮江府志

周邦彥

邦彥字美成錢唐人邠之姪元豐中獻汴都賦

召爲太學正徽宗朝仕至徽猷閣待制提舉大
晟府出知順昌府提舉洞霄宮晚居明州卒自
號清真居士有文集

陳郁話腴周邦彥字美成自號清真二百年來
以樂府獨步貴人學士市儂妓女皆知美成詞
爲可愛至于詩歌自經史中流出當時以詩名
家如晁張皆自歎以爲不及
樓攻媿云清真樂府播傳風流自命顧曲名堂
不能自己

過羊角哀左伯桃墓

溧水縣南元祐中爲令時作

古交久淪喪末世尤反覆谷風歌焚輪黃鳥譬伐木永

懷羊與左重義踰血屬客行干楚王冬雪無斗粟傾糧
活一士誓不俱死辱風雲爲慘變鳥獸同躑躅角哀哭
前途伯桃槁空谷終乘大夫車千騎下棺槨子長何所
疑舊史刊不錄獨行貴苟難義俠輕殺戮雖云匪中制
要可興薄俗荒墳鄰萬鬼溘死皆碌碌何事荊將軍摻
戈相窘逐

鳳凰臺

危臺飄盡碧梧花勝地淒涼屬楚家鳳入紫雲招不得

木魚堂殿下飢鴉

以上景定建康志

春帖子

鸞輅青旗殿閣寬
祠官奠璧下春壇
曉開魚鑰朝衣集

綵勝飄揚百辟冠

合璧事類前集

春雨

耕人扶耒語林丘
花外時時落一鷗
欲驗春來多少雨

野塘漫水可迴舟

後村千家詩

曝日

冬曦如村釀奇溫止須臾行行正須此戀戀忽已無齊東野語

天賜白

并序

永樂城陷王湛曲真夜縋以出真持木爲兵且走且敵前陷大澤中顧其旁有馬而白暫上馳去五鼓達米脂城因以得脫真名其馬爲天賜白蔡天啓得其事於西人邀予同賦

君不見書生鐫羌勒兵入羌來薄城東練急蠟丸飛出

辭大家帳下健兒紛雨泣鑿沙到石終無水擾擾萬人
如渴蟻挽絙竊出兩將軍虜箭隨來風掠耳道傍神馬
白雪毛噤口不嘶深夜逃忽聞漢語米脂下黑霧壓城
風怒號脫身歸來對刀筆短衣射虎朝朝出自椎雜寶
塗箭創心折骨驚如昨日穀城魯公天下雄陰陵一跌
兵力窮機舟不渡謝亭長有何面目歸江東將軍偶生
名已弱鐵花暗澀龍文鏹縞帳肥罽酬馬恩閒望旄頭

向西落

陳郁話

翟嗣宗

嗣宗臨淮尉

偶見蜘蛛因成四韻

織絲來往疾如梭
長愛騰空作網羅
害物身心雖甚小
漫天網紀亦無多
林間宿鳥應嫌汝
簾下飛蟲亦懼他
莫學螳螂捕蟬勇
須知黃雀奈君何

復齋謾錄翟尉臨淮頗爲監司所窘遂于館驛題蜘蛛云云林子中時爲發運過而見之召而誚責且戒以毋爲浮薄因薦之于朝

陳傳

佐郎將

林中生致佐郎將名王頭顱十四五乾德可禽嗟不謀
同惡相濟能包羞降書冉冉過中洲中軍傳呼笑點頭
蠻首算成勿藥喜君臣稱觴弭多壘元戎凱旋隔天水
夜經枕榔趨決里驅將十萬人性命換得交州數張紙

揮塵後錄元豐中交趾李乾德陷邕廉州詔郭
遠討之遂復邕州進次富良江又破之獲賊將
洪真太子者於是乾德議降而遠以重兵壓富
良江與交人止一水之隔吳冲卿丞相忌其成

功堂帖令班師遠逗遛不進交人大入全軍皆覆遠坐貶秩當時詩人陳傳作佐郎將云云

魏泰

泰字道輔襄陽人曾布之婦弟爲人無行而有口米元章稱其與王平甫並爲詩豪崇觀間章惇爲相欲官之不就有臨漢隱居集東軒筆錄

隱居詩話

桐江詩話道輔試院中因上請主文恃才豪縱不能忍一時之忿毆主文幾死生是不許取應潘子真詩話道輔博極羣書尤能談朝野可喜事疊疊終日

挽王平甫

海內文章傑朝廷亮直聞黃瓊起處士子夏遽修文貝
錦生遷怒江湖久離羣傷心王佐畧不得致華勲

東軒筆錄熙寧中河東河北陝西大飢百姓流
移于京西就食鄭俠監安上門遂畫流民圖及
疏言時政之失遂坐流竄而中丞鄧綰知諫院
鄧潤甫言王安國嘗借俠奏豪觀之有獎成之
言意在非毀其兄坐此放歸田里逾年起爲大
理丞監眞州糧料院不赴而卒余嘗爲挽詞頗
道其事

題黃魯直集

端求古人遺琢挾手不停方其得機羽往往失鵬鯨

隱居詩話黃庭堅喜作詩得名好用南朝人語專求古人未使之一二奇字綴葦而成詩自以爲工其實所見之狹也故句雖新奇而氣乏渾厚吾嘗作詩題編後云云蓋謂是也

荆門別張天覺

秋風十驛望台星想見冰壺照坐清
零雨已回公旦駕
挽鬚聊聽野王箏
三朝元老心方壯
四海蒼生耳已傾
白髮故人來一別
卻歸林下看昇平

桐江詩話詩律峻峭今人不可及也

闕題

博山燒沈水煙燼氣不滅日暮向門前楊花散成雪

潘子真詩話不減江左詩人語

優古堂詩話秦少章詩燭花漸暗人初睡金鴨無煙卻有香魏道輔詩云云與少章詩意同

寄米元章

綠野風回草偃波方塘疎雨淨傾荷幾年蕭寺書紅葉
一日山陰換白鵝湘浦夕同要月醉洞湖還憶扣舷歌
緇衣化盡故山去白髮相思一倍多

淨名齋帖

邵緝

緝神宗朝提舉淮南常平事

題長興吳城

高臺無地曲池平
漂泊句吳宿古城
一岸溼雲沈夜色

四山涼葉下秋聲

湖州府志

王无咎

无咎字補之南城人官直講

遊麻姑山

仙輶昔日此流連
氣象遼遼尚宛然
溪落斷崖爲遠瀑
路從絕頂見平田
千年芝有靈禽戲
一洞雲留羽客眠
已樂勝游塵境外
況陪清論酒尊前

麻姑山志

劉 誼

誼字宜翁長興人第進士元豐間廣東江西提
舉常平官上疏論新法勒停隱茅山

題黃山溫泉

山有靈砂泉色紅
滌除身垢信成功
不除心上無明業

只與山間衆水同

曲洧舊聞

居茅山作

曾跨江西使者鞍舊言才上便休官三茅得夢全清瘦

頭髮髭鬚布襖寬

西吳里語

趙彥若

彥若字元考師民子以父任爲將作監簿元豐

中厯官祕書監哲宗朝累擢禮部尚書翰林學

士紹聖初貶安遠軍節度副使澧州安置卒與

黨籍有集

端午帖子

揚子江中方鑄鏡未央宮裏更飛符菱花欲共朱靈合
驗盡神姦又得無

容齋五筆

周壽

壽字李老一字元翁濂溪先生長子元豐五年
進士初任吉州司戶次秀州知錄終司封郎中
題金粟寺菴

清池帶蒼巘結構俯林麓扶疎竹外山相向隔羅穀老
禪謝人境歲晚收白足誰聆梵然音息隱尚爭逐道場
坐千劫不媿桑下宿定中觀潮汐絕事心已熟

常崇澱
水志

徐嘉言

嘉言知海鹽縣事

題金粟寺菴和前韻

招提敞山岳新菴隱岳麓石沼引清流風漪皺文縠晴
暉滿虛室一水淡自足

菴前有
含暉亭

心明身宴閒境寂誰

尋逐寒林帶月行
夜榻和雲宿
若欲問西來
一齋飽秋

熟
漱水志

趙大成

閏中秋

桂影中秋特地圓
沉當餘閏魄
澄鮮因懷勝賞
初經月
免使詩人歎
隔年萬象斂
光增浩蕩
四溟收
夜助嬋娟
鮮雲清廊心
田豫乘興能無賦
詠篇

合璧事類前集



宋詩紀事卷二十八

欽定四庫全書

集部

宋詩紀事卷三十九

詳校官給事中臣鄧文泮

侍讀臣孫球覆勘

總校官進士臣繆琪

校對官典簿臣郭祚熾

謄錄監生臣劉坤

欽定四庫全書

宋詩紀事卷二十九

錢塘厲鶚撰

杜常

常字正甫衛州人昭憲皇后族孫元豐中知鄆

州權發遣秦鳳等路提刑歷官工部尚書

畫瓊錄

神宗聞昭憲之家有登第者甚喜有旨

令上殿翼日謂執政曰杜常第四人登第卻一

雙鬼眼可令提舉農田水利

題華清宮

東別家山十六程曉來和月到華清朝元閣上西風急
都入長楊作雨聲

夜雨晨霽

柏葉青青櫟葉紅高低相倚弄秋風夜來雨後輕塵斂
繡出驪山嶺上宮

溫泉

已去開元四百年此泉猶自響潺潺也知不憤當時事
長作悲聲恨祿山

驪山

漁陽烽燧起雲間
玉輦蒼黃下此山
何事君王自神武

區區南渡鹿頭關

河上楮談臨潼驪山華清宮溫泉在焉中有萃
玉屏皆宋元及今人詩刻內杜常詩四篇前題
權發遣秦鳳等路提點刑獄公事太常寺杜常
後跋云正甫大寺自河北移使秦鳳元豐三年
九月二十七日過華清有詩四首詞意高遠氣
格清古邑人曹端儀既親且舊因請副本勒諸
方石以垂不朽閏九月初一日潁州杜詡記

劉吉甫

吉甫入元祐黨籍爵里未詳

聞笛

戍鼓停撾月五更鳴鳴巧作斷腸聲江南自是春來早

吹到梅花夢也清

後村千家詩

陳一向

一向桐廬人生元豐中

題泰山靈巖寺

石龜泉畔鐵袈裟上有猿銜五色花見說道人時挂搭

旋將青拂掃煙霞靈巖詩集

黃夷仲

夷仲元豐中監察御史

調王闢之

高唐不是那高唐風物由來各異鄉若向此中求薦枕
只應愁殺楚襄王

山東通志元豐中王闢之調博州高唐令往別
監察御史黃夷仲夷仲口占一絕謔之云云此
雖詼談亦足以辨輿地之殊也

楊損

損字益老華陰人元豐中桂林郡僚

七星山新開巖洞賦呈經畧龍圖曾公

陽巖高敞納晨曦鶴駕雲輶或可期神物雕鐫元入妙
人工開闢更增奇須知水石清涼處絕勝塵沙熱惱時
紅旆碧幢勞小駐多慙主客濫追隨

桂勝

彭次雲

次雲吉水人元豐中桂林郡僚

曾公巖和曾子宣安撫

目擊煙霞畫卷舒，披榛敲石得蓬壺。
洞天日月千年久，人世塵埃一點無。
靈藥難尋雲縹緲，落花不見水縈紆。
使君鳳閣翱翔近，謾與東山作畫圖。

桂勝

彭淵材

淵材筠州人，釋惠洪覺範之叔。

句

雨過溫泉浴妃子，露濃湯餅試何郎。

海棠

冷齋夜話

張繹

繹字思叔壽安人以文名預鄉里計偕受業程
伊川之門未及仕而卒

寄友人

有客厭事事潔身山之幽寒暑不相貸乃有卒歲憂有
生此有事簡之成贅疣澄江本無浪不如信虛舟六經
力道要無以利心求一朝與理會萬境真天遊伊水正
清冷子行無滯留西風昨夜至送子至中流落月灑殘

夢已看古岸頭我病強送君是行良難儔異時青門下
誰識東陵侯

宋文鑑

張勵

勵字深道長樂人神宗朝官江淮制置發運使

題張公翊清溪圖

九華鬱兮江南山清溪下兮貫山間江北驚兮溪東旋
濁湯湯兮清漫漫山幾轉兮水幾盤近交臂兮遠連環
決天末兮浮雲端齊之山兮秋之浦景晦明兮氣吞吐

草木翁兮媚林莽繡屏張兮翠綃舞深窈窕兮幽掩鵲
雨吟猿兮風嘯虎下鳬鴈兮泳魴鱖商之檣兮漁之罟
互出沒兮更散聚樵有舍兮梵有宇雲巖阿兮棘樊圃
輦連甍兮岸之澣弄潺湲兮擢容與中橫絕兮梁爲渡
隱孤城兮其西去春之朝兮秋之夕風旣清兮月又白
遐矯首兮俯陳迹攜佳人兮不可得空望遠兮中感百
思悠悠兮情惻惻悵興亡兮懷今昔獨茲溪兮無終極
嗟夫人兮擺塵滓遙徜徉兮玩雲水移山川兮置窗几

手舒卷兮千萬里
輶余車兮秣余馬
往其從兮山之下
柰吾舟兮汎清瀉
樂魚鳥兮放林野
願未適兮何爲者
聊寓言兮公墨畫

吳禮部詩話張公翊清溪圖畫池陽清溪也郭
功甫題五絕句有唯欠子瞻詩之語遂求東坡
爲賦清溪詞蘇公復令某示秦少游寫小杜弄
水亭詩其後自元豐以來諸賢題咏甚多真蹟
在金華智者寺草堂蓋宋季王佖元敬使君得
之易世後其家以售於寺坡公作詞之後有長
樂張勵深道長句彷彿蘇體亦佳

錢祈父

祈父失其名

謝子瞻內翰浙西開府

雋庭鴛鴦集珍羣病翮摧頽下九門罪戾我慙非書錦
回翔公亦暫朱轡龔黃政化知應爾夔契謀謨想自存
缺二句 合璧事類後集

李彥弼

彥弼字端臣廬陵人元豐中桂州郡僚

傲暑棲霞洞

嵌竇棲霞敲虛轉杓左驂鸞翼右耳鳳簫爽排酷烈境
邈氛囂靜者多妙於焉消搖

粵西詩載

張吉甫

吉甫元豐中人見烏臺詩案

肖梅香

江村招得玉妃魂化作金爐一炷雲但覺清芬暗浮動
不知碧篆已氤氲春收東閣簾初下夢想西湖被更熏
眞似吾家雪溪上東風一夜隔籬聞

香乘

王仲修

仲修丞相珪之子元豐中登第官崇文院校書

慶姪耆登第

錫宴便傾光祿酒賜袍還照上林花衣冠盛事堪書日

六世詞科只一家

雞肋編岐國公王珪在元豐中爲丞相父準曾
祖贊曾祖景圖皆登進士第其子仲修元豐中
登第公有詩云三朝遇主唯文翰十榜傳家有
姓名注云自太平興國以來四世凡十榜登科
後姪仲原子耆仲孜子昂相繼登科昂又魁天
下本朝六世登第者與晁文元二家而晁一世

賜出身也崇寧四年耆初及第仲修作詩慶之

宮詞

雲嬌煙嬾雨初晴
環碧風輕細浪生
盡日黃鸝不飛去
萬年枝上聽簫聲

玉闌萬朶牡丹開
先摘姚黃獻御杯
翠幙重重圍繞定
料應蜂蝶不曾來

玉簫聲裏酌玻璃
風獵旂旗卷絳霓
星渚月斜珠露重
銀河流水亦東西

聖人獨看臨軒陛殿後雙龍捧翠華明日集英排大宴
御前先降出琵琶

教坊使花日新嘗爲臣言神宗見教坊琵琶制作不精每遇大宴前一日

降出琵琶

雪消宮殿苑梅芳曉漏聲遲下建章天氣清寒當臘日
沈香甲煎賜諸房

日沈天角曉星明上直妝成趁五更昨夜宣徽初進曲
仙韶院裏未知名十家宮詞

送越帥程公闢

一麾占得山川勝金紐新提左顧龜蒼闕鬪龍辭日下
紅旌引騎照江湄剡溪月午何妨醉曲水春餘好賦詩
玉案天香攜滿袖錦衣誰似過鄉時

剡錄

趙汝礪

汝礪官監察御史裏行

送越帥程公闢

畫舫參差看欲飛紛紛車馬壓塵泥右軍筆墨空蘭渚
安道風流訪剡溪白首得時歸莫遽丹心懷國去猶稽

月明會醉蓬萊閣應笑雲霄自有梯

剡錄

曾孝宗

送越帥程公闢

虎符分鎮浙江東
艤櫂都門使旆雄
雙漿徘徊粉社日
高牙搖曳剡溪風
蓬萊閣讌公書簡
賀監湖游獄榜空
行聽越民歌德政
亟還青瑣見旌忠

剡錄

王仲甫

仲甫字明之岐公之從子少年以詞賦登科

中吳紀聞仲甫風流翰墨名著一時其歿也丁
永州注葆光祭之有云爽秀豪拔出於天資談
經咏史博識周知文華自得不務競時古格近
體率意一揮金玉鏘揚組繡陸離世俗所得特
其歌辭生習華貴不見艱巖徘徊鵝閣出入鳳
池乘興南遊曠達不羈朝賞夕宴選勝搜奇擺
脫冠裳卻去輪蹄不驚榮辱不競是非擾擾萬
緒付于一庖頽然終日去智忘機

無題

黃金零落大刀頭玉筍歸期劃到秋紅錦寄魚風逆浪
碧簫吹鳳月當樓伯勞知我經春別香蠟窺人一夜愁
好去渡江千里夢滿天梅雨是蘇州

中吳紀聞仲甫客吳門嘗有所愛住京師爲岐
公強畱之逾時不返因作詩云云此詩效古樂
府豪砧今何在體人皆愛其巧

苗時中

時中字子中甬上人元豐中廣南西路轉運副
使

曾公巖和曾子宣安撫

紅旆尋幽東郭旁泉巖新得冠殊方一川氣象天開作
萬古榛荆地蔽藏崖穴乍驚堂室關榜名知與日星長

異時人指溪橋水思愛還同召伯棠

桂勝

毛滂

滂字澤民衢州人爲杭州法曹任滿去抵富陽
以詞爲東坡所賞追還知名後乃出京下之門
嘗知武康縣政和中守嘉禾有東堂集

揮塵後錄毛澤民受知曾文肅擢置館閣文肅
南遷坐黨與得罪流落久之蔡元度鎮潤州與
澤民俱臨川王氏壻澤民傾心事之一日家集
觀池中鴛鴦元度席上賦詩云莫學飢鷹飽便
飛澤民和呈曰貪戀恩波未肯飛元度夫人笑
曰豈非適從曾相公池中飛過來者乎澤民大

慙

夏夜

毒暑彌三伏微涼起二更月窗風竹亂煙渚露荷傾

後村

千家詩

溪上

溪光照秋房娟然臥流萍水仙弄幽姿寄余汀洲情眷

懷玉色子弄波濯塵纓夜寒有佳意屬此泠然清

全芳
備祖

響潭

水面平鋪映碧空
夜深明月照龍宮
猿啼未響潭先響
一樹花開兩樹紅

遊翠峯寺

隔牆楊柳舞腰斜
傍砌鵝梨玉作花
此地風光誰管領
小詩收入長官家

以上西吳里語

曉出定光寺

曉出開霜阪
飢鳥啄麥畦
山腰餘雪瘦
天面冷雲低
寒意梅花北
禪心栢子西
窗前借殘月
照我度前溪

題餘英館

故第園林改遺亭壁戶新垂虹一橋月夾繡兩隄春花
落俯流水烏啼懷故人憑闌看翠荇無意數游鱗

以上
湖州

府志

下渚湖

春渚連天闊春風夾岸香飛花渡水急垂柳向人長遠

岫分蒼紫澄波映渺茫此身萍梗爾泊處即吾鄉

武康
縣志

句

百里飽看紅穠楹一杯輕媿黑蜿蜒禱雨湘煙錄

蔡載

載字天任潤州人肇之弟元豐中嘗爲晉陵簿
尋以薦改承事郎

錢伸仲漆塘四詠

結廬傍林泉偶與初心期佳處時自領未應魚鳥知
亭
初遂

白雲來何時英英冠山椒西風莫吹去使我心搖搖
望雲

亭

高人不惜地自種無邊春莫隨流水去恐汙世間塵芳

亭

水行天地間萬派同一指胡爲穿石來要洗巢由耳

通惠

亭

容齋三筆錢仲仲大夫於錫山所居漆塘村作
西亭自其先人已有卜築之意而不克就故名
曰遂初先壠在其上名曰望雲種桃數百千株
名曰芳美鑿池涌泉或以爲與惠山泉同味名
曰通惠求詩于一時名流自葛魯卿汪彥章孫
仲益既各極其妙而母舅蔡天任四絕獨擅場

諸公皆自以爲弗及也
庚溪詩話蔡天任頗工詩筆力窺陶謝之藩錢
仲仲漆塘詩唯天任語簡而意遠諸公服其韻
勝

題膠山寺繡佛

妙相奪天真針針巧入神幾多瞻佛者還想用心人

常州

府志

盛次仲

次仲元豐中翰林學士

題慈溪普濟寺松石小軒呈關彥長明府

一松偃蹇蒼龍蟠一石巉巖怒虎踞我來題作龍虎軒
祇恐風雲捲將去乾道四明圖經

句

看來天地不知夜飛入園林總是春

冷齋夜話盛學士次仲孔舍人平仲同在館中
雪夜論詩平仲曰當作不經人道語曰斜拖闕
角龍千丈澹抹牆腰月半梭坐客皆稱絕次仲
曰句甚佳惜其未大乃云云平仲服其工

陳律

律政和人元豐八年進士龍溪令

游洞霄山中

古木陰陰擁澗深
青山九鎖極幽尋
白雲也似知人意
飛落長松伴醉吟

洞霄詩集

樓 异

异字試可鄞人元豐八年進士建中靖國初爲
登封令累官徽猷閣直學士知平江府提舉崇

福宮

嵩山二十四詠

并序

存四首

僕性嗜山水幾成癖所至雖假館僦舍莫不聚拳石
環斗池終日玩觀殆忘食寢一旦來令嵩陽正在清
泉白石中始至數月訟庭清暇乃芟廢圃鑿芙蓉菡
萏二池取餘土築臺高五丈許名之揖山北面嵩嶽
西顧少室南望許由自餘諸峯環擁軒檻于是居高
遠眺盡山川之形勢暇日既作三十六峯賦以自廣
然僕舊聞嵩山二十四峯圖經傳記所不載求之土
人亦莫知也一日觀明大師李得柔勝之自京師來

訪迺得其名出道藏吳天師靈跡記歷東而西一一
可指遂命畫史圖諸峯於仰嵩堂以證其名僕謂勝
之曰二十四峯之名湮沒久矣今自吾二人者發之
不可無述也乃作嵩山二十四詠並命勝之作焉

華蓋峯

華蓋峯高未易窮捫參厯井到天中回頭卻顧人間世
但見羣青似小童

玉女峯

玉仙曾此駐雲車日薄窗紗映雪膚
七字天書人不辨
定知元女手中符

青童峯

斬新高髻掠雲開翠色羅衣一樣裁
知有真仙此中住
故令天女捧書來

玉鏡峯

皎皎冰盤瑩百圍廣寒宮殿見依稀
春山萬疊渾如洗
浮翠光中一鏡飛

以上河南府志

宿少林寺

六六仙峯遶佛居，俗塵至此暫銷除。
西來未悟禪師意，北去還馳使者車。
五品封槐今尚在，九年面壁昔何如。
心知一宿猶難覺，花藏重尋貝葉書。

嵩少集

強淵明

淵明字隱季，至子元豐八年進士。宣和中爲翰林學士承旨，兼太子賓客，卒贈資政殿學士，諡文憲。

景鐘頌

并序

宣和元年八月丁丑皇帝詔大晟作景鐘是月二十
五日鐘成皇帝以身爲度以度起律以律審聲以聲
制鐘以鐘出樂而樂宗焉予以祀天地饗鬼神朝萬
國罔不用乂在廷之臣再拜稽首上頌

明明天子以身爲度有景者鐘衆樂所怙於昭於天乃
眷斯顧揚于大廷罔不時序億萬斯年受天之祐

揮塵
後錄

薛昂

昂字聲明錢唐元豐八年進士附蔡京仕至
尚書左丞靖康初責徽州居住

羅志仁姑蘓筆記薛昂賦蔡京君臣慶會閣詩
云逢時可謂真千載拜賜應須更萬同時人謂
之薛萬回

能改齋漫錄荆公在鍾山下慕薛門下昂與焉
賭梅花詩一首薛敗而不善詩荆公爲代作今
集中所謂薛秀才者是也薛既宦達出知金陵
或者嘲以詩曰好笑當年薛七兒荆公坐上賭
梅詩而今又向江東去奉勸先生莫下慕薛書
名似丐字故人有乞兒之論

湖堂

一段風煙不可關出門滿目是湖山昔人華廈今何在

湖堂在涌金門旁郡守蔣樂安公勦建

此日漁舟任自閒鳳觀漸新

霄漢上

近作涌金樓甚偉

龍洲依舊水雲間

柳洲祠五龍此兩處與湖

堂鼎足相對

歸來丘壑多幽趣願與諸賢約往還

咸淳臨安

志

陳祐

祐字純益仙井監人第進士建中靖國初爲右

司諫入黨籍編管歸州赦還卒有集

冬夜

寒氣侵人夜未央
九門傳令一聲長
庭除半露牆根雪

月影斜分瓦墮霜

後村千家詩

朱京

京字世昌南豐人舉進士官太常博士元符初

遷國子司業

祥光寺

山寺藏遺刻塵埃字半昏
空揮峴首淚誰起謝公門白

石千年像蒼頭五世孫他年想陳迹卜築向雲根

西江詩話

俞紫芝

紫芝字秀老金華人流寓揚州少有高行不娶

游王荊公之門弟澹字清老志操修潔頗使酒

有詩名敝帚集

詩人王屑有時俗事不稱意無數好山都上心
俞紫芝秀老句荊公手寫於扇山谷所書釣魚
船上謝三郎一帖石刻在金山寺雞林每入貢
輒市數百本以歸亦秀老句也

石林詩話紫芝少有高行不娶得浮屠氏心法
所至儵然而工於詩王荊公尤愛重之每見於

詩所謂公詩何以解人愁初日芙蓉暎碧流未
怕元劉爭獨步不妨陶謝與同游是也秀老嘗
有夜深童子喚不起猛虎一聲山月高之句尤
爲荆公所賞和云新詩比舊仍增峭若許追攀
莫太高秀老卒於元祐初惜時無發明者不得
與林和靖一流槩見於隱逸

南澗月夕

華髮念秋晚青燈憐夜長香團菊花露寒著橘林霜月
在北窗底人行南澗傍婆娑不知去身世兩相忘

旅中諭懷

白浪紅塵二十春就中奔走費光陰有時俗事不稱意

無限好山都上心一面琴爲方外友數篇詩當橐中金
會須將爾同歸去家在碧溪煙樹深

以上宋文鑑

咏草

滿目芊芊野渡頭不知若箇解忘憂細隨綠水侵離館
遠帶斜陽過別洲金谷園中荒映月石頭城下碧連秋
行人悵望王孫去買斷金釵十二愁

歲杪山中

石亂雲深客到稀鶴和殘雪在高枝小軒日午貪濃睡

門外春風過不知

以上墨莊漫錄

吳興

沽酒店穿斜巷出採蓮船傍後門歸翠靄城郭三千點
清蘸樓臺水一圍

談鑰吳興志

松聲

萬壑搖蒼煙百灘度流水下有跨驢人蕭蕭吹凍耳

鍾山僧舍酬辟疆祕授

同謁臨川丞相時不期顏色偶然披綠葵自得山人味

絳帳難求俗士知
午磬喚回幽枕夢
夕陽催就小牕詩
松毛桂葉山川路
肯顧非公復是誰

水村閒望

畫橈兩兩枕汀沙
隔岸煙蕪一望賒
翡翠閒居眠藕葉
鷺鷥別業在蘆花
溪雲淡淡迷漁屋
野旆翩翩露酒家
可惜一綳眞水墨
無人寫得寄京華

以上詩林萬選

句

莫怪野人經宿住
白蘋霜落蟹螯肥

蟹畧

饒竦

竦臨川人

下第投荆公

又還垂翅下丹霄
歸指臨川去路遙
二頃荒田都賣卻
要錢準備納青苗

豫章詩話

龍太初

詠沙

茫茫黃出塞
漠漠白鋪汀
鳥去風平篆
潮回日射星

王直方詩話郭功甫方與荆公坐有一人展刺云詩人龍太初功甫勃然曰相公前敢稱詩人其不識去就如此荆公曰但且請來相見既坐介甫曰賢道能詩爲我賦乎是時方有一老兵以沙擦銅器荆公即曰可作沙詩太初不頃刻間誦云云功甫遂閣筆太初緣此名聞東南

王邦憲

客宛陵遇鄉人作

集句

揚子江頭楊柳春
衣冠南渡多崩奔
柳條弄色不忍見
東西南北更堪論
誰謂他鄉各異縣
豈知流落復相見
青春作伴好還鄉
爲問淮南米貴賤

竹坡詩話司馬溫公稱其敘事有情致爲可喜

王復

復洛人鄉貢進士官典郡正郎

句

早秋蟬有信多雨暑無權

題洛陽大字院

明道雜誌

李愿

愿官京東轉運使

四景樓在登州蓬萊縣北

縱目有佳處須登四景樓輪蹄喧市井桑穀暗郊丘翠
蓋雲生裏滄溟天盡頭闌干知幾曲徙倚恣清愁

山東通志

王忠玉

忠玉失其名東坡集有與王忠玉游虎丘詩此
刻但題忠玉同時又有馬中玉未知孰是

遊華清畱絕句

廢宇頽垣不復新朝元輦道盡荆榛惟餘一派溫湯水

長與行人洗路塵

己未八月二日

驪山刻石

朱光庭

光庭字公掞河南偃師人以父景蔭擢第從呂
大防於長安幕府哲宗朝仕至右諫議大夫出
知亳州徙潞州卒紹聖中追貶柳州別駕入黨
籍

華清偶成

驪山秀色古今同盡入詩人感慨中只徇霓裳一曲樂
不知天下樂無窮

元豐辛酉仲春八日

驪山刻石

吳雍

雍字子中治平初平涼令元豐中爲秦帥

登驪山閣留詩

山頭羯鼓奏霓裳斷送君王入醉鄉凭閣無言念興廢

孤煙猶起泰陵傍

元豐八年十月四日

驪山刻石

宋詩紀事卷二十九